

Na osnovu člana 31. stav 4. i člana 72. Zakona o hrani („Službeni glasnik BiH“, broj 50/04) i člana 17. Zakona o Vijeću ministara Bosne i Hercegovine („Službeni glasnik BiH“, br. 30/03, 42/03, 81/06, 76/07, 81/07, 94/07 i 24/08) Vijeće ministara Bosne i Hercegovine, na prijedlog Agencije za sigurnost hrane Bosne i Hercegovine, u saradnji s nadležnim organima entiteta i Brčko distrikta Bosne i Hercegovine na _____ sjednici održanoj _____2019. godine, donijelo je

PRAVILNIK
O USLOVIMA I POSTUPKU IZDAVANJA DOPUŠTENJA ZA STAVLJANJE
NOVE HRANE NA TRŽIŠTE BOSNE I HERCEGOVINE

DIO PRVI - OPĆE ODREDBE

Član 1.

(Predmet)

- (1) Pravilnikom o uslovima i postupku izdavanja dopuštenja za stavljanje nove hrane na tržište Bosne i Hercegovine (u daljnjem tekstu: Pravilnik) propisuju se:
 - a) uslovi i postupak za izdavanje dopuštenja za stavljanje nove hrane na tržište Bosne i Hercegovine,
 - b) uslovi koji se odnose na sljedivost i označavanje nove hrane.
- (2) Ovim pravilnikom se osigurava pravilno funkcioniranje unutrašnjeg tržišta Bosne i Hercegovine pružajući pritom visok nivo zaštite zdravlja ljudi i interesa potrošača.
- (3) Odredbe ovoga Pravilnika primjenjuju se ne dovodeći u pitanje odredbe posebnih propisa entiteta, koji se odnose na novu hranu.

Član 2.

(Definicije)

- (1) U smislu ovog Pravilnika, primjenjuju se definicije i značenje pojedinih izraza utvrđene u članu 2. i 3. Zakona o hrani („Službeni glasnik BiH“, broj 50/04).
- (2) „Nova hrana” znači sva hrana koja se nije u značajnoj mjeri upotrebljavala za prehranu ljudi u Bosni i Hercegovini, a pripada barem jednoj od sljedećih kategorija:
 - a) hrana s novom ili namjerno izmijenjenom molekularnom strukturom, ako se ta molekularna struktura nije do sada upotrebljavala kao hrana ili u hrani u BiH;
 - b) hrana koja se sastoji ili je proizvedena od mikroorganizama, gljivica ili algi ili koja je iz njih izolovana;
 - c) hrana koja se sastoji ili je proizvedena od tvari mineralnog porijekla ili koja je iz njih izolovana;
 - d) hrana koja se sastoji ili je proizvedena od biljaka ili njihovih dijelova ili je iz njih izolovana, osim kada ta hrana ima historiju sigurne upotrebe hrane u BiH te se sastoji ili je proizvedena od, ili je izolovana iz biljke ili sorte iste vrste dobivene:
 - 1) tradicionalnim tehnikama razmnožavanja koje su se do sada upotrebljavale za proizvodnju hrane u BiH, ili

- 2) netradicionalnim tehnikama razmnožavanja koje se nisu do sada upotrebljavale za proizvodnju hrane u BiH ako te tehnike ne uzrokuju značajne promjene u sastavu ili strukturi hrane koje utiču na njezinu nutritivnu vrijednost, metabolizam ili nivo nepoželjnih tvari;
- e) hrana koja se sastoji ili je proizvedena od životinja ili dijelova životinja ili je iz njih izolovana, osim ako su životinje uzgojene tradicionalnim tehnikama uzgoja koje su se do sada upotrebljavale za proizvodnju hrane u BiH i ako hrana dobivena od tih životinja ima historiju sigurne upotrebe hrane na tržištu u BiH;
- f) hrana koja se sastoji ili je proizvedena od kultura stanica ili tkiva dobivenog od životinja, bilja, mikroorganizama, gljivica ili algi ili koja je iz njih izolovana;
- g) hrana koja je rezultat proizvodnog postupka koji se do sada nije upotrebljavao za proizvodnju hrane u BiH, a kojim se uzrokuju značajne promjene u sastavu ili strukturi hrane koje utječu na njezinu nutritivnu vrijednost, metabolizam ili nivo nepoželjnih tvari;
- h) hrana koja se sastoji od sintetizirani nanomaterijala kako su definirani u stavu (5) ovog člana;
- i) vitamini, minerali i druge tvari koji se upotrebljavaju u skladu sa posebnim propisima ako:
 - 1) je primijenjen proizvodni postupak iz stava (2) tačke g) ovog člana koji se do sada nije upotrebljavao za proizvodnju hrane u BiH, ili
 - 2) sadrže sintetizirane nanomaterijale kako su definirani u stavu (5) ili se od njih sastoje;
- j) hrana koja se upotrebljavala isključivo u dodacima prehrani ako je namijenjena za upotrebu u hrani koja nije dodatak prehrani u skladu sa posebnim propisom;
- (3) „podnosilac zahtjeva” je subjekti u poslovanju s hranom koji na tržište Bosne i Hercegovine namjeravaju staviti novu hranu a registrovan je u Bosni i Hercegovini.
- (4) “zahtjev za izdavanje dopuštenja” je valjan zahtjev koji sadrži dokumente propisane u članu 6. ovog Pravilnika.
- (5) „sintetizirani nanomaterijal” znači svaki namjerno proizvedeni materijal čija je jedna ili više dimenzija manja ili jednaka veličini od 100 nm ili manje ili koji se sastoji od odvojenih funkcionalnih dijelova, bilo u unutrašnjosti ili na površini, od kojih mnogi imaju jednu ili više dimenzija veličine 100 nm ili manje, uključujući strukture, aglomerate ili agregate koji mogu biti veći od 100 nm, ali zadržavaju svojstva koja su karakteristična za nano nivo.
- (6) Svojstva karakteristična za nano nivo obuhvaćaju:
 - a) svojstva povezana s velikim specifičnim površinama materijala koji se uzimaju u obzir;
 - b) i/ili specifična fizičko-hemijska svojstva koja se razlikuju od svojstava materijala istog sastava koji nisu u nanoobliku.

Član 3.

(Izuzeci od primjene)

Odredbe ovog Pravilnika ne primjenjuju se na:

- a) genetički modificiranu hranu, uređenu Pravilnikom o uslovima i postupku izdavanja odobrenja za stavljanje genetički modificirane hrane i hrane za životinje prvi put na tržište Bosne i Hercegovine i zahtjevima koji se odnose na njihovu sljedivost i označavanje („Službeni glasnik BiH“, broj 78/12 i 62/15);
- b) hranu ako se koristi kao:
 - 1) prehrambeni enzimi, uređeni Pravilnikom o prehrambenim enzimima u hrani („Službeni glasnik BiH“, broj 66/14);
 - 2) prehrambeni aditivi, uređeni Pravilnikom o prehrambenim aditivima („Službeni glasnik BiH“, broj 33/18);
 - 3) arome, uređene Pravilnikom o upotrebi aroma u hrani („Službeni glasnik BiH“, broj 78/14);
 - 4) ekstrakcijski rastvarači koji se koriste u proizvodnji hrane, propisani Pravilnikom o pomoćnim tvarima u procesu proizvodnje („Službeni glasnik BiH“, broj 28/11), osim u slučaju dodatnih zahtjeva u pogledu njihove sigurnosti i označavanja, kada moraju ispunjavati uslove iz ovog Pravilnika.

Član 4.

(Opći uslovi za stavljanje nove hrane na tržište)

Nova hrana obuhvaćena područjem primjene ovog Pravilnika:

- a) ne smije na osnovu raspoloživih naučnih dokaza, predstavljati opasnost po zdravlje ljudi;
- b) ne smije svojom predviđenom upotrebom, dovoditi potrošača u zabludu, naročito ako je namijenjena da zamjeni drugu hranu i kada je njena nutritivna vrijednost značajno promijenjena;
- c) ako je namijenjena da zamjeni drugu hranu, ne smije da se razlikuje od te druge hrane na način da bi njena uobičajena konzumacija bila nutritivno nepovoljna za potrošača.

DIO DRUGI - STAVLJANJE NA TRŽIŠTE

Član 5.

(Dopuštenje za stavljanje na tržište nove hrane)

- (1) Na tržište Bosne i Hercegovine dopušteno je stavljanje samo nove hrane koja je kao takva dopuštena za stavljanje na tržište Europske unije od strane Europske komisije i evidentirana u Listi nove hrane dopuštene za stavljanje na tržište Europske unije.
- (2) Listu nove hrane, kojom se preuzima Lista nove hrane dopuštene za stavljanje na tržište Europske unije, Odlukom donosi direktor Agencije za sigurnost hrane BiH i ista se objavljuje u “Službenom glasniku BiH”.
- (3) Za stavljanje nove hrane prvi put na tržište Bosne i Hercegovine subjekt u poslovanju s hranom mora dobiti dopuštenje u skladu s odredbama ovog Pravilnika.
- (4) Subjekt u poslovanju s hranom prilikom stavljanja nove hrane na tržište Bosne i Hercegovine mora podnijeti zahtjev za izdavanje dopuštenja Agenciji za sigurnost hrane Bosne i Hercegovine (u daljnjem tekstu: Agencija).

- (5) Dopuštenje iz stava (4) ovog člana izdaje Agencija, uz prethodnu suglasnost entitetskih ministarstava nadležnih za poljoprivredu i Odjela za poljoprivredu Brčko distrikta Bosne i Hercegovine.

Član 6.

(Zahtjev za izdavanje dopuštenja)

- (1) Zahtjev za izdavanje dopuštenja za stavljanje nove hrane na tržište Bosne i Hercegovine, sa Liste nove hrane navedene u Odluci (u daljem tekstu: zahtjev), sadrži:
- a) ime i adresu podnosioca zahtjeva (naziv uvoznika/distributera ili onog koji novu hranu pakuje i/ili stavlja na tržište, a registrovan je u Bosni i Hercegovini);
 - b) naziv nove hrane;
 - c) dokaz da je nova hrana koja je predmet zahtjeva na listi nove hrane dopuštena za stavljanje na tržište Europske unije;
 - d) uslovi pod kojima se nova hrana može upotrebljavati (određene kategorije hrane i maksimalno dopuštene količine) ukoliko su određeni;
 - e) detaljan sastav nove hrane (specifikacija) ukoliko je određena;
 - f) dodatni posebni zahtjevi za označivanje proizvoda ukoliko su određeni a koji ne dovode potrošača u zabludu;
 - g) ostali zahtjevi ukoliko su određeni.
- (2) Svi priloženi službeni dokumenti iz stava (1) ovog člana moraju biti na jednom od jezika i pisama koji su u službenoj upotrebi u Bosni i Hercegovini.
- (3) Uz zahtjev, podnosilac je obavezan priložiti dokaz o uplati administrativne takse u postupku podnošenja zahtjeva i izdavanja rješenja. Način popunjavanja uplatnice propisat će Agencija Uputstvom o popunjavanju uplatnice za uplatu administrativne takse u postupku podnošenja zahtjeva i izdavanja rješenja o dopuštenju za stavljanje nove hrane na tržište Bosne i Hercegovine.
- (4) Agencija potvrđuje podnosiocu zahtjeva prijem zahtjeva u pisanom obliku u roku od 14 dana od dana prijema zahtjeva. U potvrdi se navodi datum prijema zahtjeva.
- (5) Agencija sažetak zahtjeva stavlja na raspolaganje javnosti na osnovu javno dostupnih informacija iz stava (1) tačke a) i b) ovog člana.

Član 7.

(Saglasnost nadležnih organa)

- (1) Agencija kopiju zahtjeva sa priloženom dokumentacijom iz člana 6. ovog Pravilnika dostavlja na mišljenje nadležnim organima iz člana 5. stav (5) ovog Pravilnika, najkasnije 15 dana nakon provjere njegove valjanosti.
- (2) Nadležni organi dostavljaju Agenciji mišljenje o zahtjevu, najkasnije u roku od 30 dana od dana dostavljanja zahtjeva, u protivnom se smatra da su saglasni.
- (3) Agencija donosi rješenje nakon zaprimanja mišljenja od većine nadležnih organa.

Član 8.

(Rješenje o dopuštenju)

- (1) Agencija u roku od 30 dana od dana prijema mišljenja nadležnih organa, svojim rješenjem daje, odnosno uskraćuje dopuštenje za stavljanje nove hrane na tržište Bosne i Hercegovine uzimajući u obzir sljedeće:
 - a) ispunjavanje uslova predviđenih članom 4. i 5. ovog Pravilnika,
 - b) princip predostrožnosti navedene u članu 8. Zakona o hrani („Službeni glasnik BiH”, broj 50/04),
 - c) mišljenje nadležnih organa i
 - d) sve ostale faktore važne za zahtjev koji se razmatra.
- (2) Rješenje o dopuštenju iz stav (1) ovog člana mora sadržavati:
 - a) naziv subjekta u poslovanju sa hranom kojem se izdaje dopuštenje;
 - b) naziv nove hrane;
 - c) uslove pod kojima se nova hrana može upotrebljavati (određene kategorije hrane i maksimalno dopuštene količine);
 - d) detaljan sastav nove hrane (specifikacija);
 - e) zahtjeve za posebno označavanje nove hrane u skladu s članom 12. ovog Pravilnika;
 - f) mišljenja nadležnih organa, izjašnjenja o prijedlozima nadležnih organa, kao i nadležni organi koji nisu dostavili svoje prijedloge.
- (3) Rješenje se izdaje na period od pet godina, uz nadzor i posebno navođenje hrane na koju se primjenjuje.
- (4) Protiv rješenja iz stava (1) ovog člana nije dozvoljena žalba ali se može pokrenuti upravni spor.
- (5) Tužba protiv rješenja iz stava (1) ovog člana ne odgađa njegovo izvršenje.

Član 9.

(Izmjena i obnova rješenja)

- (1) Podnosilac zahtjeva, u skladu s postupkom iz člana 5. do 8. ovoga Pravilnika, može podnijeti zahtjev za izmjenu rješenja.
- (2) Dopuštenje za stavljanje nove hrane na tržište može se obnoviti.
- (3) Zahtjev za obnovu dopuštenja za stavljanje nove hrane na tržište Bosne i Hercegovine podnosi se Agenciji najkasnije tri mjeseca prije isteka roka na koji je dato dopuštenje za stavljanje nove hrane na tržište.
- (4) Uz zahtjev za obnovu dopuštenja za stavljanje nove hrane na tržište Bosne i Hercegovine, potrebno je priložiti sljedeće podatke i dokumente:
 - a) kopiju rješenja o dopuštenju;
 - b) sve dostupne podatke koji se odnose na dokumentaciju iz člana 6. ovog Pravilnika, a koji nadopunjuju podatke već dostavljene Agenciji tokom prethodnog zahtjeva, a dopunjeni su podacima najnovijeg naučnog i tehnološkog razvoja;
 - c) dokaz o uplati administrativne takse.

Član 10.

(Zabrana stavljanja na tržište)

- (1) Ako se na osnovu novih informacija utvrdi da postoji opravdani razlog da nova hrana predstavlja opasnost za zdravlje ljudi, Agencija će u saradnji sa nadležnim inspeksijskim

organima, privremeno ili trajno zabraniti njeno stavljanje na tržište radi sprečavanja ili umanjivanja mogućih negativnih uticaja na zdravlje ljudi.

- (2) U slučaju novih naučnih saznanja o tome da li je nova hrana opasna za zdravlje ljudi, subjekat u poslovanju s hranom kojem je izdano rješenje o dopuštenju obavezan je da obavijesti Agenciju.

Član 11.

(Registar o izdanim dozvolama za stavljanje na tržište nove hrane)

- (1) Agencija vodi registar o izdanim dozvolama (rješenjima) za stavljanje nove hrane na tržište Bosne i Hercegovine.
- (2) Registar o izdanim dozvolama (rješenjima) vodi se u elektronskoj formi kako je propisano Aneksom, koji je sastavni dio ovog Pravilnika, objavljuje se u „Službenom glasniku BiH” i na web-stranici Agencije.

DIO TREĆI – OZNAČAVANJE

Član 12.

(Označavanje nove hrane)

- (1) Nova hrana koja se stavlja na tržište Bosne i Hercegovine se označava u skladu sa odredbama Pravilnikom o pružanju informacija potrošačima o hrani („Službeni glasnik BiH“, broj 68/13).
- (2) Nova hrana koja se stavlja na tržište Bosne i Hercegovine, pored općih zahtjeva za označavanje iz stava (1) ovog člana, sadrži i dodatne podatke u vezi sa označavanjem, posebno u odnosu na opis hrane, njena svojstva, porijeklo, sastav ili uslove predviđene upotrebe, kako bi se osiguralo potpuno informisanje potrošača o prirodi i sigurnosti nove hrane, naročito kada je u pitanju osjetljiva populacija stanovništva.

DIO ČETVRTI - PRIJELAZNE I ZAVRŠNE ODREDBE

Član 13.

(Službene kontrole i inspeksijski nadzor)

Službene kontrole i inspeksijski nadzor nad primjenom ovog Pravilnika provodit će se u skladu s važećim zakonskim propisima.

Član 14.

(Prijelazne odredbe)

Subjekti u poslovanju novom hranom uskladit će svoje poslovanje sa odredbama ovog Pravilnika u roku od šest mjeseci od dana stupanja na snagu ovog Pravilnika.

Član 15.

(Prestanak važenja propisa)

Danom stupanja na snagu ovog Pravilnika prestaju da važe odredbe Pravilnika o uslovima i postupku izdavanja dopuštenja za stavljanje nove hrane prvi put na tržište Bosne i

Hercegovine i zahtjevima za posebno označavanje nove hrane („Službeni glasnik BiH“, broj 68/12).

Član 16.

(Usklađivanje sa zakonodavstvom Europske Unije)

Ovim Pravilnikom se preuzimaju odredbe definirane Uredbom (EU) 2015/2283 Europskog parlamenta i Vijeća od 25. novembra 2015. godine o novoj hrani, o izmjeni Uredbe (EU) br. 1169/2011 Europskog parlamenta i Vijeća i o stavljanju izvan snage Uredbe (EZ) br. 258/97.

Član 17.

(Stupanje na snagu)

Ovaj pravilnik stupa na snagu osmog dana od dana objavljivanja u „Službenom glasniku BiH“.

Predsjedavajući
Vijeće ministara BiH
dr. **Denis Zvizdić**

VM broj _____19
2019. godine

S a r a j e v o

ANEKS

REGISTAR O IZDATIM DOZVOLAMA ZA STAVLJANJE NA TRŽIŠTE NOVE HRANE

R.b.	Podnosilac zahtjeva/adresa	Broj zahtjeva za izdavanje rješenja o dopuštenju	Mišljenje nadležnih organa	Dopuštena nova hrana	Broj i datum izdavanja Rješenja o dopuštenju	Datum važenja Rješenja

O B R A Z L O Ž E N J E

ZA DONOŠENJE PRAVILNIKA O USLOVIMA IZDAVANJA DOPUŠTENJA ZA STAVLJANJE NOVE HRANE NA TRŽIŠTE BOSNE I HERCEGOVINE

I. ZAKONSKA OSNOVA

Zakonski osnov za donošenje Pravilnika o uslovima izdavanja dopuštenja za stavljanje nove hrane na tržište Bosne i Hercegovine sadržan je u članu 17. Zakona o Vijeću ministara Bosne i Hercegovine („Službeni glasnik BiH“, br. 30/03, 42/03, 81/06, 76/07, 81/07, 94/07 i 24/08), i u članu 31. stav 4. i članu 72. Zakona o hrani („Službeni glasnik BiH“, broj 50/04), na osnovu kojih Vijeće ministara BiH, na prijedlog Agencije za sigurnost hrane BiH u saradnji sa nadležnim organima entiteta i Brčko Distrikta BiH, donosi provedbene propise kojima se uređuje kvalitet hrane.

II. RAZLOZI ZA DONOŠENJE PROPISA I OBJAŠNJENJE ODABRANE POLITIKE

Agencija za sigurnost hrane Bosne i Hercegovine formirana je na osnovu Zakona o hrani („Službeni glasnik BiH“, broj 50/04), Odlukom o osnivanju Vijeća ministara BiH, kao samostalna upravna organizacija, autoritet za sigurnost hrane i hrane za životinje, primjenu međunarodnih konvencija i međunarodnih sporazuma iz područja sigurnosti i kvaliteta hrane obavezujućih za Bosnu i Hercegovinu.

Na prijedlog Agencije, u suradnji sa nadležnim tijelima entiteta i Brčko distrikta BiH, Vijeće ministara BiH donosi provedbene propise kojim se uređuje kvalitet hrane, radi:

- a) Zaštite interesa potrošača,
- b) Omogućavanja potrošačima da izvrše izbor u vezi sa hranom koju upotrebljavaju i
- c) Zaštite interesa proizvođača.

U Bosni i Hercegovini je trenutno važeći propis: Pravilnik o uslovima i postupku izdavanja dopuštenja za stavljanje nove hrane prvi put na tržište Bosne i Hercegovine i zahtjevima za posebno označavanje nove hrane („Službeni glasnik BiH“, broj 68/12).

Ovaj pravilnik propisuje zahtjevnju proceduru za stavljanje nove hrane prvi put na tržište, i ne prepoznaje novu hranu koja je kao takva odobrena za stavljanje na tržište Europske unije od strane Europske komisije i evidentirana u Listi nove hrane odobrene za stavljanje na tržište Europske unije. Implementaciju ovog pravilnika, onemogućava i neformiranje Naučnog odbora koji bi davao mišljenja u procesu stavljanja nove hrane prvi put na tržište Bosne i Hercegovine.

Subjekti u poslovanju s hranom u Bosni Hercegovini obraćali su se Agenciji sa zahtjevima za izmjene postojećeg pravilnika ili pripremu novog pravilnika koji će omogućiti ravnopravan položaj subjektima u poslovanju s hranom, da novu hranu koja je kao takva priznata u Europskoj uniji i upisana u Listu nove hrane odobrene za stavljanje na tržište Europske unije, u jednostavnijoj proceduri mogu stavljati na tržište Bosne i Hercegovine.

O navedenom je upoznat i Upravni odbor Agencije, koji je zadužio Agenciju da sagleda mogućnost izmjene i dopune pravilnika u dijelu koji se odnosi na stavljanje na tržište BiH nove hrane koja je već odobrena u EU, a koje će pojednostaviti procedure stavljanja nove hrane na tržište BiH.

Slijedom naprijed navedenog, Agencija je pripremila novi Pravilnik o uslovima i postupku izdavanja dopuštenja za stavljanje nove hrane na tržište Bosne i Hercegovine. U novom pravilniku, normirano je da je na tržište Bosne i Hercegovine dopušteno stavljanje samo nove hrane koja je kao takva odobrena za stavljanje na tržište Europske unije od strane Europske komisije i evidentirana u Listi nove hrane odobrene za stavljanje na tržište Europske unije, a da Listu nove hrane, kojom se preuzima Lista nove hrane odobrene za stavljanje na tržište Europske unije, Odlukom donosi direktor Agencije za sigurnost hrane BiH i da se ista objavljuje u “Službenom glasniku BiH”.

Listom nove hrane odobrene za stavljanje na tržište Europske unije bi se preuzimala Provedbena Uredba komisije (EU) 2018/1023 od 23. srpnja 2018. o ispravku Provedbene uredbe (EU) 2017/2470 o utvrđivanju Unijina popisa nove hrane, te bi se na taj način omogućilo blagovremeno i potpuno praćenje zakonodavstva Europske unije kada je u pitanju ažuriranje liste odobrene nove hrane.

III. PRINCIPI NA KOJIMA JE ZASNOVAN PROPIS

Pravnim propisom – Odredbama pravilnika propisuju se uslovi i postupci izdavanja dopuštenja za stavljanje nove hrane na tržište Bosne i Hercegovine kao i uslovi koji se odnose na sljedivost i označavanje nove hrane.

IV. USKLADENOST

U pravnom naslijeđu Europske unije (*acquis communautaire*), predmetnu oblast pravnog propisa – Pravilnika o uslovima i postupku izdavanja dopuštenja za stavljanje nove hrane na tržište Bosne i Hercegovine regulirano je:

- UREDBA (EU) 2015/2283 EUROPSKOG PARLAMENTA I VIJEĆA od 25. studenoga 2015. o novoj hrani, o izmjeni Uredbe (EU) br. 1169/2011 Europskog parlamenta i Vijeća i o stavljanju izvan snage Uredbe (EZ) br. 258/97 Europskog parlamenta i Vijeća i Uredbe Komisije (EZ) br. 1852/2001.

V. PROVEDBENI MEHANIZMI I NAČIN OSIGURAVANJA

Službena kontrola i inspekcijski nadzor će se provoditi na način kako je to propisano važećim zakonskim i podzakonskim propisima.

VI. FINANSIJSKA SREDSTVA

Za primjenu odredbi ovog Pravilnika nije potrebno osigurati dodatna sredstva u budžetu Bosne i Hercegovine.

VII. OPIS KONSULTACIJA

U skladu sa članom 17. Pravila za konsultacije u izradi pravnih propisa („Službeni glasnik BiH”, broj 05/17) i odredbama Jedinostvenih pravila za izradu pravnih propisa u institucijama Bosne i Hercegovine („Službeni glasnik BiH”, br. 11/05, 58/14, 60/14, 50/17 i 70/17):

- Obavješćavanje i objavljivanje Prijedloga propisa na internet stranici Agencije za sigurnost hrane BiH, u dijelu koji se odnosi na javne konsultacije;
- Direktno dostavljanje Prijedloga propisa na komentare i mišljenja nadležnim organima Bosne i Hercegovine, entiteta i Brčko distrikta Bosne i Hercegovine.
- Stavljanje na web portal e-Konsultacije.

VIII. RASPORED EVENTUALNOG PONOVRNOG PREISPITIVANJA DONESENOG PROPISA

U skladu sa nastalim izmjenama i dopunama legislative Europske unije sa kojom je vršeno usklađivanje, te na osnovu stečenih iskustava kroz primjenu propisa i u skladu sa nastalim potrebama.

IX. EKONOMSKI, SOCIJALNI I OKOLIŠNI UTICAJ PROPISA

Ovaj pravilnik nema nikakvog okolišnog ni ekonomskog utjecaja, dok je socijalni utjecaj vjerovatno mali, s obzirom da se istim, kao provedbenim propisom detaljnije i lakše omogućava implementacija propisa i pravila vezanih za postupak izdavanja dopuštenja za stavljanje nove hrane na tržište BiH.